

# Powšitkowne WOZJEWJENJA

njedźelu, 22. septembra 2013

## Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprošuje tež lětsa na wosebity nyšpor domchowanki z požohnowanjom konjacych zapřahow. Tutón budže přichodnu njedźelu, 29. septembra, w 14 hodź. w Chrósćicach na luce při Hatkach, kotryž wobrubu Njebjelčanski cyrkwinski chór.

## Džeń za 3. a 4. lětnik

Džěci 3. a 4. lětnika su sobotu, 12. oktobra, wot 9 do 15 hodź. na zhromadny džeń do Don Boskoho domu we Worklecach přeprošene. Zajimcy njech so prošu hač do pónđzele, 7. oktobra, pod telefonowym čisłom (03 5796) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk we wysokosći třoch eurow.

## Serbskorěčne eksercicije

Maće hišće jedyn džeń dowola? Mam namjet, kak móhli jón wužić k wočerstwjenju a připódla so nasrěbać duchownych mocow. W Drježdžanskim eksercicijnym domje Wysoke duby wotměja so wot štwórtka, 10. oktobra, wječora hač do njedźele, 13. oktobra, připołdnja eksercicije za serbskich wěrnych. Jezuitski pater Willi Lambert kurs přewjedže. Modlitwy a kěrlušy budu serbske, přednoški němske. Nimo toho su tam přijomne stwy, dobra kuchnja a krasna wokolina k wuchodžowanju. Zajimcy njech so telefonisce přizjewja pola mje pak na Chróšćanskej farje, telefonowe čisło (03 57 96) 8 04 00, abo mobilnje (01 51) 10 27 95 88.

*Marija Clausenowa*

## Wjacednjowska jězba za džěci 5. a 6. lětnika

Na pućowanje po slědach swjateho Bena a na wotkrywanje dalších zajimawostkow kónčiny mjez Drježdžanami a Mišnom přeprošuje Dekanatne dušepastyrstwo džěci 5. a 6. lětnika wot pónđzele do štwórtka, 21. do 24. oktobra. Za jězbu zběra so wot kóždeho wobdźělnika přinošk we wysokosći 60 eurow. Zajimcy njech so prošu hač do pónđzele, 7. oktobra, pod telefonowym čisłom (03 57 96) 8 87 07 we Worklecach přizjewja.

## „Spěwace pišćele“

Klasiske twórby, kotrež so na njezwučene wašnje přednjesu, zaspěwa bariton Urmaz Pevgonen a zahraje organist Karol Bialas njedźelu, 6. oktobra, w 17 hodź. w Chróšćanskej cyrkwi. Swój koncert mjenujetaj „Spěwace pišćele“.

## W Domje swjateje Ludmile pytaja fachowu móc

W Chróšćanskim Domje swjateje Ludmile pytaja hladarku abo hladarja starych ludźi respektiwne chorobnu sotru abo hladarja. Dalše informacije dóstanu zajimcy wot wjednistwa domu, telefonowe čisło (03 57 96) 9 47 10.